

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
18.10 सोमवार दिनांक 18.11.2024

प्रमुख समाचार –

- छत्तीसगढ़ विधानसभा के चौथा सत्र सोलह दिसंबर ले होही सुरू— विधानसभा सचिव ह आज जारी करीन अधिसूचना।
- बीजापुर जिला म सुरक्षा बल मन ह आईईडी प्लांट करे बर आय आठ जिन माओवादी मन ल घेराबंदी करके करीन गिरफ्तार।
- मौसम विभाग के मुताबिक उत्तर-पूर्व कोति ले ठंडा हवा आय के सेति प्रदेश म जाड़ा पड़े के बताय गेहे संभावना।

विधानसभा सत्र

छत्तीसगढ़ विधानसभा के चौथा सत्र सोलह दिसंबर ले सुरू होही। ए बारे म विधानसभा सचिव दिनेश शर्मा डहार ले आज अधिसूचना जारी कर दे गेहे। सीतकालीन सत्र बीस दिसंबर तक चलही। ए सत्र म कुल चार बइठका होही। सीतकालीन सत्र के दउरान वित्तीय कामकाज के संगेसंग आने सरकारी काम संपादित करे जाही।

बस्तर विकास प्राधिकरण—बैठक

मुख्यमंत्री विष्णुदेव साय के अगुवई म बस्तर क्षेत्र आदिवासी विकास प्राधिकरण के बइठका आज चित्रकोट म चलत हे। ए बइठका म बस्तर म सांति सुरक्षा अउ विकास काम काज के बात चलही।

बड़ठका ले पहिली मुख्यमंत्री ह आज सर्किट हाउस म होय कारीकरम म जनजाति परंपरा के संरक्षक बैगा, गुनिया अउ सिरहा मन ल साल अउ श्रीफल देके सम्मानित करीन। ए मउका म मुख्यमंत्री ह बैगा, गुनिया अउ सिरहा जइसन परंपरागत जनजातीय समुदाय मन ल अब हरेक साल पांच-पांच हजार रूपिया के सम्मान निधि देके घोसना करीन। मुख्यमंत्री ह किहीन कि राज्य सरकार ह जनजातीय समाज के संस्कृति अउ परंपरा के विकास बर हर बेरा आगू रइही।

राज्यपाल लेखा परीक्षा विभाग

राज्यपाल रमेन डेका ह आज रईपुर स्थित प्रधान महालेखाकार आफिस म लेखा परीक्षा सप्ताह के सुभारंभ करीन। ए मउका म ओमन किहीन कि भारतीय लेखा अउ लेखा परीक्षा विभाग ह सरकार अउ जनता के बीच एक ठिन सेतु हरय, जउन ह ए पक्का करथे कि हर संसाधन के बने ढंग ले परयोग होवय अउ जउन फइसला होथे ओहा समाज के हित म होवय। राज्यपाल ह किहीन कि लेखा परीक्षा सिरिफ सरकारी खरचा अउ राजस्व के जांच तक सीमित नइ हे। ए ह प्रशासनिक पारदर्शिता अउ वित्तीय अनुशासन के एक ठिन बढ़िया माध्यम हरय। ए मउका म राज्यपाल ह सामुदायिक भवन परिसर म पउधा घलो लगइन। लेखा परीक्षा सप्ताह बाईस नवंबर तक चलही।

माओवादी गिरफ्तार

बीजापुर जिला म सुरक्षा बल मन ह आईईडी प्लांट करे बर आय आठ झिन माओवादी मन ल जवान मन ह घेराबंदी करके गिरफ्तार करे हे। एखर मन तीर ले बिस्फोटक जिनिस के संगेसंग नक्सली प्रचार-प्रसार के सामग्री घलो बरामद करे गेहे। पुलिस ले मिले जानबा के मुताबिक उसूर थाना ले जिला पुलिस बल अउ डिस्ट्रिक्ट रिजर्व गार्ड डीआरजी के संयुक्त टीम ह टेकमेटला कोति सर्चिंग अभियान म निकले रिहीन। ए पकड़े गे माओवादी मनके तीर ले तीन ठिन टिफिन बम, कार्डेक्स वायर, बिजली के तार अउ माओवादी जिनिस बरामद करे गीस।

ओति, नारायणपुर जिला के उत्तरी अबूझमाड़ वाले जघा म सुरक्षा बल मन ह माओवादी मन डहार ले लगाय गे दू ठिन आईईडी बरामद करे हे, जेला मउकच म निष्क्रिय कर दे गीस।

मूलवासी बचाओ मंच

राज्य सरकार ह माओवाद प्रभावित जघा मन म चलाय जात मूलवासी बचाव मंच ल एक साल बर प्रतिबंध लगा देहे। ए बारे म गृह विभाग डहार ले आदेस जारी कर दे गेहे। मूलवासी बचाव मंच डहार ले माओवाद प्रभावित क्षेत्र मन म सुरक्षा बल के कैप अउ राज्य सरकार डहार ले चलाय जात कतकोन विकास काम के सरलग विरोध करे जात रिहीस। सुरक्षा ल देखत राज्य सरकार ह छत्तीसगढ़ विसेस जन सुरक्षा अधिनियम दू हजार पांच के तहत ए संगठन उपर एक साल बर प्रतिबंध लगा देहे।

वन विभाग-कार्यशाला

केरल के बाद छत्तीसगढ़ ह देस के दूसर राज्य होही, जउन ह अपन इको-रेस्टोरेसन पॉलिसी बनावत हे। इही कड़ी म आज वन अउ जलवायु परिवर्तन विभाग के मदद ले छत्तीसगढ़ इको-रेस्टोरेसन पॉलिसी उपर दूसर राज्य स्तरीय परामर्स कार्यशाला के आयोजन नवा रईपुर म करे गीस। कार्यशाला म छत्तीसगढ़ के पूर्व प्रधान वन संरक्षक डॉक्टर आर. के. सिंह, इंडियन काउंसिल ऑफ फॉरेस्ट्री रिसर्च एंड एजुकेशन के बड़का वैज्ञानिक डॉक्टर संजय सिंह के संगेसंग छत्तीसगढ़ के कृषि, पंचायत, माइनिंग अउ आने विभाग के अधिकारी मन ए कार्यशाला म सामिल होइन। आकाशवाणी समाचार ले गोठबात करत छत्तीसगढ़ राज्य जलवायु परिवर्तन केंद्र के नोडल अधिकारी अरुण कुमार पाण्डेय ह किहीन कि केरल के बाद छत्तीसगढ़ ह अपन इको-रेस्टोरेसन पॉलिसी बनावत हे। ए बारे म आज दूसर राज्य स्तरीय परामर्स कार्यशाला होइस, जेमा जम्मो बिसेसज्ञ मन ले सलाह ले गीस। श्री पाण्डेय ह बतइन कि जनवरी महिना म इको-रेस्टोरेसन पॉलिसी के ड्राफ्ट ल राज्य सरकार ल भेजे जाही। राज्य सरकार के मंजूरी के बाद इको-रेस्टोरेसन पॉलिसी लागू करइया छत्तीसगढ़ ह देस के दूसर राज्य बन जही।

वक्फ बोर्ड—आदेश

राज्य वक्फ बोर्ड ह एक ठिन आदेस जारी करके प्रदेस के मस्जिद मन म हरेक जुम्मा माने शुक्रवार के नमाज के बाद होवइया तकरीर के बिसय उपर वक्फ बोर्ड ले मंजूरी लेना जरूरी कर देहे। ए आदेस छत्तीसगढ़ राज्य वक्फ बोर्ड के नवा अध्यक्ष सलीम राज ह प्रदेस के मस्जिद मनके मुतवल्ली ल चिट्ठी भेज देहे। ओमन आकाशवाणी समाचार ल बतइन कि ए आदेस बाईस नवंबर ले लागू हो जही।

शराब घोटाला —सीबीआई जांच

राज्य सरकार ह सराब घोटाला के आरोपी अरुणपति त्रिपाठी के खिलाफ सीबीआई जांच के मंजूरी दे देहे। अरुणपति त्रिपाठी ह आबकारी विभाग म बिसेस सचिव के रूप म काम करत रिहीन। ए दउरान उंखर उपर भ्रष्टाचार के आरोप हे। अरुणपति त्रिपाठी के खिलाफ ए बेरा छत्तीसगढ़ म ईडी अउ एसीबी के जांच चलत हे। उहें, उंखर मन उपर झारखंड म घलो सराब घोटाला के आरोप हे।

विशेष कार्यक्रम

प्रदेस म ए बेरा नगरीय निकाय अउ त्रिस्तरीय पंचायत चुनई बर निर्वाचक नामावली बर नाव जोड़वाय के काम चलत हे। दावा—आपत्ति करे के आखिरी तारीख बीस नवंबर हे। राज्य निर्वाचन आयुक्त अजय सिंह ले बिसेस गोठबात के प्रसारण आकाशवाणी रईपुर ले काली बिहनिया नौ बजे करे जाही। ए कारीकरम ल प्रदेस स्थित आकाशवाणी के जम्मो केंद्र एफ.एम. अउ मीडियम वेब चैनल ह एके संघरा रिले करही।

ठगी आरोपी—गिरफ्तार

गौरेला-पेण्ड्रा-मरवाही जिला के मरवाही पुलिस ह रेलवे म नौकरी लगाय के नाव उपर करीबन बारह लाख रुपिया के ठगी करइया आरोपी ल पश्चिम बंगाल के आसनसोल ले गिरफ्तार करे हे। ठगी के सिकार मनखे डहार ले पुलिस म सिकइत दर्ज कराय के बाद मरवाही पुलिस ह ए कार्यवाही करीन हे। आरोपी ह बारह लाख रुपिया ल आने-आने किस्त म आसनसोल म चले नौ महिना के ट्रेनिंग के दौरान ले रिहीन। मरवाही पुलिस डहार ले पहिली घलो तीन झिन आने आरोपी मन ल ठगी के आरोप म गिरफ्तार कर चुके हे। उहें, ए मामला के मुख्य आरोपी उपर आसनसोल म फर्जी पुलिस अधिकारी बनके उंहा घूमे के मामला घलो दरज हे।

बैडमिंटन/किक बॉक्सिंग प्रतियोगिता

रईपुर के मोवा म चले सीएम ट्रॉफी इंडिया इंटरनेशनल चैलेंज बैडमिंटन प्रतियोगिता काली सिरागे। समापन समारोह म मुख्यमंत्री विष्णुदेव साय ह किहीन कि राज्य सरकार ह खेल प्रतिभा ल आगू बढ़ाय बर संकल्प लेहे। ओमन किहीन कि ओलंपिक म स्वर्ण पदक जितइया छत्तीसगढ़ के खिलाड़ी ल तीन करोड़ रुपिया, रजत पदक जितइया ल दू करोड़ अउ कांस्य पदक बिजेता ल एक करोड़ रुपिया के प्रोत्साहन रासि दे जाही। ए प्रतियोगिता म दस ठिन देस के खिलाड़ी मन भाग लीन। मुख्यमंत्री ह विजेता खिलाड़ी मन ल बधई अउ सुभकामना दीन।

ऐति, सरगुजा जिला के चार झिन खिलाड़ी मन ह कर्नाटक के कुर्ग म होय प्रोफेशनल नेशनल किक बॉक्सिंग प्रतियोगिता म दू स्वर्ण, एक रजत अउ एक ठिन कांस्य पदक जीते हे। ए प्रतियोगिता म स्वाति राजवाड़े अउ सरवर एक्का ह स्वर्ण पदक, सत्यम साहू ह रजत अउ संजना मिंज ह कांस्य पदक जीतिन। ए प्रतियोगिता दस ले चौदह नवंबर तक होइस।

उहें, चौबीसवां राष्ट्रीय वनवासी क्रीड़ा प्रतियोगिता रईपुर म सत्ताईस ले इकतीस दिसंबर तक होही। ए प्रतियोगिता म करीबन आठ सौ खिलाड़ी मन भाग लिही। प्रतियोगिता के तियारी अउ आने काम काज बर सुवागत समिति बना दे गेहे।

मौसम

उत्तर-पूर्व कोति ले हवा आय के सेति प्रदेस म ए बेरा जाड़ा थोरकुन बाढ़ गेहे। मौसम विभाग के मुताबिक अवइया तीन दिन म न्यूनतम तापमान म अउ गिरावट होय के संसो जताय गेहे। राजधानी रईपुर म काली पारा गिरके सोलह दसमलव आठ डिग्री सेल्सियस होंगे रिहीस, जउन ह ए सीजन के सबले कम तापमान हरय। रईपुर के बाहिरी जघा म पारा ह पंद्रह डिग्री ले कमती होंगे।
